

## Ləkaləkətə ŋga Yahuda

<sup>1</sup> Wiinə ləkaləkətə ca dzə daciiki Yahuda, ndzəkəŋuci Yakubu. Ma nya, əndə slənə ŋga Yeesu \*Aləmasiihu nə nyi. Agi naahənə nə nyi koonə, ənjitə 'wii Əntaŋfə tuunə, una ndzaanə agi uudənə ŋga Əntaŋfə Dəsənaamə, Yeesu Aləmasiihu a dzə də nəhənə tuunə.

<sup>2</sup> Wa Əntaŋfə a da koonə ŋga'əənə, ca vii koonə ndzaanə jamə da uudənə a ədzəmuunə aakəŋwa aakəŋwa.

### *Maliminə ŋga jirakənə*

<sup>3</sup> Kafashinyinaakya, kə dīi nyi aniya ka shaŋə kaa nya naahə koonə agyanə luupaanə ənə upaa amə patə. Amma ma nee nyi, gədfə wa nya naahə koonə kaa nya kədii tuunə koona da gazhi'waanə agi wabənə ŋga Əntaŋfə, ənjə a vii goŋga. Acii gahu rəŋwə baarii Əntaŋfə goŋgaanaakii ka ənjaakii.

<sup>4</sup> Ma bii nyi ha'ə, tə'i hara ənji ətə pooshi shii tə Əntaŋfə iitəgərə aahadoonə, təya da gazhi'waanə ŋga gwazee ka habara ŋga pwapoonə ŋga Əntaŋfə, kaa təya shii upaa rəgwa ŋga da tsarə ŋga bwaya uushi ətə kadeesəkə ka tii. Də danə ha'ə makə ətsə ci təya kaaree ka Yeesu Aləmasiihu Gawə gaamə, Slandanaamə əsə. Daga ŋukə tə'i manaahəkii

asəkə ləkələkətə makə sətə nə Əntañfə a zamagi də tii.

<sup>5</sup> Taa ɲgahi kə shii unə sənə cii kya moo banə, amma ɲga'ə ka nyi kaa nya ənə ka buurətənə koonə oo'i, ma ɲga ɲukə, kə luupaa Əntañfə tə ənjaakii kaa təya bwasee ka hanyinə ɲga Misəra. Patə da ha'ə, ma daaba'əkii, kə zamagi ci də hara ənji ahadatii ətə pooshi vii ka ci gooŋga.

<sup>6</sup> Ha'ə əsə, buurətəmə habara ɲga malaa'ikanyiitə pooshi luuvə kaa təya ndzaanə ka hatə dəkəpaa Əntañfə tə tii. Ma təya, kə bwasee tii ka hatə dəkəpaa Əntañfə tə tii. Wata ca kaalagərə tə tii aagi təkunə ruku ruku. Ma'aanəkii asəkə mahyakahyaka'ə nə tii ka ca'ə ndəɲwə ndəɲwə. See mada mbu'ya uuseratə nə Əntañfə a da gəɲwanə ka \*duuniya.

<sup>7</sup> Buurətəmə agyanə vəranyinə ɲga \*Sadooma da \*Gwamoora da hara vəranyiitə kədə kədəhə da tii əsə. Ma ənji ɲga vəranyiitsa, kə dzəgərə tii aagi dā ajijinəənə kama kama, təya bwasee ka rəgwa gooŋga. Kə upaa tii shikwatii ɲga ndzaanə agi gunə ɲga ca'ə ndəɲwə ndəɲwə. Ətsə boo, kə ndzaa ka dzalənə paŋgəraŋə ka patənə ɲga ənja.

<sup>8</sup> Ha'ə əsə nə ənjitə iitəgərə aahadoonə. Kə sənii tii səniinə ətə kavə tə tii ka ajijinətə shishinətii, təya bərapaa baawəda ɲga Əntañfə, təya dzaana tə uushi'iitə dadagyə da

---

**1:4 4-13** 2 Piita 2.1-22. **1:4 4** Gal. 5.13; 2 Piita 2.1. **1:5 5** Shig. 12.51; Baan. 14.29-30; 1 Koor. 10.5; 2 Piita 1.12-13. **1:6 6** 1 Piita 3.19-20; 2 Piita 2.4. **1:7 7** 'Wat. 19.1-24; 2 Piita 2.6.

məghərəvənə.

<sup>9</sup> Mikayilu maa, ətə dīi ka gawə ŋga malaa'ikanyinə pata, paa ci dzaanii tə \*Seetanə də makii. Saa'itə pii tii da Seetanə agyanə wə ŋga Muusa, paa ci haŋətə naakii nə bahə wabə bwaya uushi aashi Seetanə. Amma wata ma bii ci ka ci, "Wa Əntaŋfə a dzalə tə hə." \*

<sup>10</sup> Amma ma ənjitsə ahadoonə, agi dzaananə nə tii uushi'iitə pooshi tii paaratəgi. Ma təya, makə dabiinə nə tii yadə hiima. Acii agi d'anə nə tii see sətə shigi a moodəfətii. Ma təya dzə də d'anə ha'ə makə ətsa, gəŋwanə nə tii ka əlyanə aagyanətii.

<sup>11</sup> Kə lii ŋgəra'wə tə tii, acii kə ŋgire tii tsaasəfə ŋga Kaa'inu, kə vigi tii natii nə ka da 'waslyakəənə, kaa təya shii upaa də kwaba, makə sətə shi Balaamə a dīi. Agi d'anə nə tii panə da Əntaŋfə makə sətə shi Koorə a dīi. Acii ha'ə ka zaamaginə nə Əntaŋfə də tii, makə sətə shi ca zaamagi də Koorə. †

<sup>12</sup> Ma agi gəshinə goonə, kə ndzaa tii makə dīinə ahadoonə. Pooshi uushi shii tii, maɗaamə natii nə tanə. Pooshi ayinə agitii əsə. Makə kurabiinə ətə ci mədə a pyawərigi yadə ndzəmənə ŋga vənə nə tii. Makə ənfugiitə pooshi ka poonə taa ka saa'yatii nə tii. Makə ənfugiitə ci ənjə a mbuudəgi nə tii, təya huurəgi hwa'ə.

---

**1:8 8 2** Piita 2.10. \* **1:9 9** Dzək. 34.6; Zak. 3.2; 2 Piita 2.11; Mikayilu: Səniinə 12.7. **1:10 10 2** Piita 2.12. † **1:11 11** Kaa'inu: 'Wat. 4.3-8; 1 Yooh. 3.12; Balaamə: 'Baan. 22.7,17; 1 Piita 2.15; Koorə: 'Baan. 16.1-34. **1:12 12 2** Piita 2.13,17.

<sup>13</sup> Ma tii, makə ma'iitə ca ngərəma əndə nə tii. Təya dəvə ka natii nə ayinə. Makə tikisanyitə pooshi ka kəŋaanənə ka hakii nə tii. Ma təya, kə dəkəpaa Əntaŋfə ka tii ha agi matəku təku ha ruku ruku. Davə nii təya ndzaanə ka ca'ə ndəŋwə ndəŋwə.

<sup>14</sup> Agyanə tsarə ŋga ənjitsa shi Anuuhu a wabi. Ma ca, ci nə mədəfənə ŋga slikərənə ndzaŋənə ka Adamu. Kə bii ci, “Kadə nə Slandanə a shi da malaa'ikanyinaakii gya'ə pu'unyinə da gya'ə pu'unyinə, yadə baanatənə. †

<sup>15</sup> Ka la gəŋwanə ka patənə ŋga ənji cii kəya shi. Bwayakii ka shaŋə nə gəŋwanaakii a ndzaanə ka ŋga ənjitə pooshi nyi'u tə Əntaŋfə, acii bwayakii nə slənətə dəaadii tii da uushi'iitə baabii tii aashikii.”

<sup>16</sup> Ma ənjitsa, uusəra patə nə tii ka ngəərə ma, taa guci patə nə tii ka ngəərə ma də hara ənja, təya də sətə kadeesəkə ka shishinətii, təya haŋətə natii na, təya də mandikə-ndikə wabənə ka gəpətə də ənja, kaa təya shii nə'u rəgwatii.

### *Wabənə ka ənji nə'unə*

<sup>17</sup> Kadashinyinaakya, ma wabəətə shi masləkee ənji ŋga Slandanaamə Yeesu Aləmasiihu a bii koonə oo'i kadə na də, ga ca zaanə koonə.

<sup>18</sup> Kə njii təya baaba koonə, “Ma ka muudinə ŋga duuniya, kadə nə ənjə a shigi ətə na ŋsə tuunə. Ma ənjitsa, paa tii shii tə Əntaŋfə. Agi dəfanə nə tii sətə kadeesəkə ka tii tanə.”

**1:13 13** Isaa. 57.20; 2 Piita 2.17. † **1:14 14** Mat. 25.31; Anuuhu: 'Wat. 5.18,21-24; Ibər. 11.5. **1:17 17** 2 Piita 3.2. **1:18 18-19** 2 Piita 3.3; 2 Tim. 3.1; 3.2-6.

19 Tii nə ənjitə ca kira təkəshinə aahada ənja, ənji nga duuniyanə nə tii, pooshi tii shii Ma'yanə nga Əntanfə.

20 Kadashinyinaakya, ma unə, d'amə gazhi'waanə nga tsakəshinə ahadoonə, koona shii dzənə aakəŋwa də zəjanə agi vii goonğaane goonə ətsə shi daciai Əntanfə ci saakii. Dəmə aakəŋwa də da də'wa də ŋgeerənə nga Malaaba Ma'yanə.

21 Kavəmə noonə na aagi uudənə nga Əntanfə, una gəra saa'itə nə Slandanaamə Yeesu Aləmasiihu a nəhə təgunuunə gaamə, ca vii kaamə əpinə nga ca'ə ndəŋwə ndəŋwə.

22 Tə'i hara ənji pooshi tii ba'avə. Ma tsarə nga ənjitsa, nəhəmə təgunuunatii.

23 Luupaamə hara ənji acii gunə. Ma hara ənji əsə, nəhəmə təgunuunatii. Amma una dzə də kavə na acii ga təya ŋusləgi duunə. Taa kəjeerənatii maa, mandəkii putə nga ajjiniənə nga ndzaanatii. Acii ha'ə, goona təbətə shəŋə.

### *Dəlaamə də Əntanfə*

24 Dəlaamə də Əntanfə. Ci nə əndə da baawəda nga nəhənə tuunə acii goona ŋusləgi gakii a rəgwa. Ka mbeenə nə ci ka ŋgərəgi koonə patənə nga 'waslyakəənə goonə, ca kira tuunə ka ndzaanə agi ŋwanjuunaakii, una ndzaanə də moodasəkə ka shəŋə.

25 Dəlaamə də Əntanfə, acii ci daanəkii nə Slandanə agyanə taa mi patə. Ci luupaa taamə daciai Slandanaamə Yeesu Aləmasiihu. Wa ənjə

a dɔunɔtɔ tɔ ci, ɔnjɔ a dɔla dɔ ci. Ci ca dɔ  
ɲwanɲuunɔ ka ca'ɔ ndɔɲwɔ ndɔɲwɔ, ndzanɔnɔ  
ka 'watɔginɔ, ka mbu'yanɔ ka ɔnshinɔ ka dɔɲɔ  
ka muudinɔ. \*Aamiina.

**Gude: Kura Aləkawalə nga Əntənfə**  
**Gude: Kura Aləkawalə nga Əntənfə New Testament**

copyright © 2000 Wycliffe Bible Translators, Inc.

Language: Gude

Contributor: Wycliffe Bible Translators, Inc.

All rights reserved.

2025-05-02

---

PDF generated using Haiola and XeLaTeX on 2 May 2025 from source files  
dated 2 May 2025

56396c70-45d3-5118-be46-8c4c3fec34f1